

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

- लेफ्टिनेंट गवर्नर मनोज सिन्हा होरें आखेआ ऐ जे महाकुंभ, अध्यात्मिकता, शिक्षा, अनुभव ते ज्ञान दा अनोखा संगम ऐ ते एह भारत दी आध्यात्मिक विरासत, संस्कृति ते परंपराएं दा प्रतीक बी ऐ।
- बड़हाल ग्रां च 4 होर जने रहस्यमयी बमारी करी कसरी होई गे न। इंदे चा 3 जनें गी ब्हाई रस्तेया जम्मू आंदा गेआ ऐ जिसलै के पैहले शा भर्थी इक मरीज गी ब्हाई रस्तेया पीजीआई चंडीगढ़ पुजाया गेआ, जेह्दी हालत हून स्थिर ऐ। जम्मू दे डिवीजनल कमिशनर ते एडीपीजी होरें बड़हाल दा दौरा लाइयै उत्थे कीते गेदे हीलें दा जायजा लैता।
- मुख्यमंत्री ओमर अब्दुल्ला होरें सिविल सैकटरेट जम्मू च केई डेलीगेशनें कन्नै मलाटी कीती।
- उपमुख्यमंत्री होरें साना इलाके दा दौरा लाइयै उत्थे जनता दरबार लाया ते गल्ली थमां कटेरी तगर सिड़क परियोजना दा नीह पत्थर बी रक्खेआ।
- मंत्री सकीना इत्तू होरें आरक्षण नियमें बारै खडेरी गेदी काबीना दी उप-कमेटी दी बैठक दी प्रधानता कीती।

<><><><><><>

LG-Samagan

उपराज्यपाल मनोज सिन्हा होरें कल उत्तर प्रदेश दे प्रयागराज महाकुंभ च श्रीम-भागवत समागम गी संबोधत कीता। इस मौके पर आचार्य महामंडलेश्वर स्वामी कैलाशनंद गिरी जी महाराज होरें शिरकत कीती। अपने संबोधन च उपराज्यपाल होरें आध्यात्मिक गुरुएं, विचारकें ते समाजी लीडरें गी राष्ट्र निर्माण लेई इकजुट होइयै कम्म करने लेई आखेआ। उनें आखेआ जे साढ़ा मुख मकसद सब्बने मनुक्खें दी एकता दे विचारें गी बड़ावा देना ऐ। उपराज्यपाल होरें आखेआ जे महाकुंभ आध्यात्मिक, शिखा, तर्जुबे ते आत्मज्ञान दा संगम ऐ ते भारत दी आध्यात्मिक विरासत, संस्कृति ते परंपराएं दा प्रतीक ऐ। उनें आखेआ जे महाकुंभ च संतें दी मजूदगी साढ़े रस्ते गी रोशन करदी ऐ ते साफ सुथरा जीवन जीने लेई असेंगी रस्ता दस्सदी ऐ।

<><><><><><>

Badhaal Updates

रजौरी दे जिला मैजिस्ट्रेट होरें कोटरंका सब-डिवीजन च रहस्यमयी बमारी दे लपेटे च आए दे बड़हाल ग्रां गी नियंत्रित इलाका यानि कन्टेनमेंट ज़ोन घोषित करी दित्ता ऐ। तोआई बड़हाल ग्रां थमां 4 होर लोक इस रहस्यमयी बमारी करी कसरी होई गे न जिंदे च 3 भैहनां शामिल न। इ'नें सब्बनें गी बड़हाल ग्रांS थमां अस्पताल च भर्ती करोआया गेआ ऐ। इस ग्रांS च पिछले 47एं दिनें दरान इस रहस्यमयी बमारी करी 17एं लोकें दी मौत होई गेदी ऐ। केन्द्री गृह मंत्रालय नै इ'नें मौतें दी जांच लेई इक केन्द्री टीम खड़ेरी दी ऐ जेहदी तपतीश बरोबर जारी ऐ। सूत्तरें मूजब, 16एं थमां 22एं ब'रें दी उम्री दिए त्रै भैहनें गी कल उसलै बड़हाल थमां सरकारी मेडिकल कॉलेज रजौरी च मुंतकिल कीता गेआ जिसलै उंदी सेहत चानचक्क गै मती बिगड़ी गई। इंदे च 22एं बरें दी तज़ीम अख्तर, 18एं ब'रें दी खालिदा बेगम ते 16एं ब'रें दी नाज़िया कौसर शामिल न। एह सब्बै बड़हाल ग्रां दे रन्थान मोरा दे बसनीक बाग हुसैन दिआं धीआं न। इ'नें त्रौनें भैहनें गी भारती वायु सेना दे हेलीकाप्टर राहें रजौरी थमां जीएमसी जम्मू पुजाया गेआ। इंदे अलावा कल दपैहरी 18एं ब'रें दी शबनम अख्तर गी बी कसरी होने पर बड़हाल ग्रां थमां जीएमसी रजौरी पुजाया गेआ। परोआर दे सदस्यें ते रिश्तेदारें दी गुजारिश पर उसी बी जीएमसी जम्मू रैफर कीता जा करदा ऐ। इ'नें सब्बनें मरीजें गी बखार ते होर दुइयां इक्कै नेइयां समस्यां पेश आवै करदिआं न। एह चौनें मरीज ओकड़े त्रै परोआरें दे नेड़मे रिश्तेदार न जिंदे सदस्यें दी इस रहस्यमयी बमारी करी मौतां होई दिआं न। तोआई 25एं ब'रें दे जावेद अहमद नांS दे इक होर मरीज दी हालत मती बिगड़ी जाने पर उसी जीएमसी जम्मू थमां ब्हाई रस्तेया पीजीआई चंडीगढ़ लेता गेआ ऐ। जंदी संज्ञां हासल होई दी रिपोर्ट मूजब ओदी हालत स्थिर दस्सी जा करदी ऐ। नमीं दिल्ली थमां बक्ख-बक्ख मंत्रालयें आहली इक टीम नै अपनी जांच दे हिस्से दे तौर उप्पर उप्परोतली त्रीये ध्याड़े बड़हाल ग्रां दा दौरा लाया।

<><><><><><>

Div Com

जम्मू दे डिवीजनल कमीशनर रमेश कुमार ते पुलसा दे एडिशनल डरैक्टर जनरल आनंद जैन होरें कल राजौरी जिले दे बड़हाल ग्रां दा दौरा लाइयै उत्थें बने दे हालात ते मकामी बसनीकें दी सुरक्षा लेई कीते जा'रदे हीलें दा जायजा लैता। इस मौके पर राजौरी दे डिप्टी कमीशनर होरें गी निर्देश दित्ते गे जे ओह प्रभावत परोआरें दे नेड़मे संपर्क च आए दे लोकें गी बड़हाल ग्रां थमां नर्सिंग कालेज ते सरकारी मेडिकल कालेज राजौरी रु फौरी तोर पर मुंतकिल कीता जाना जकीनी बनान। एहदे अलावा बच्चे दे विकास सरबंधी प्रोजेक्ट अफसरें, ब्लाक विकास अधिकारिणें ते उंदे मतैह्त अमले गी निर्देश दित्ते गे जे ओह शिनाख्त कीते गेदे लोकें दी एकड़ी थाहरें पर निर्बिघ्न ढंगै नै आओजाई जकीनी बनान। डिवीजनल कमीशनर होरें सब्बने सरबंधत अधिकारिणें गी निर्देश दित्ते जे ओह हीलें दी असरदार अमलावरी गी जकीनी बनाइयै आपसी तालमेल बनाइयै कम्म करन।

<><><><><><>

मुख्यमंत्री उमर अब्दुल्ला होरें कल सिविल सचिवालय च केई प्रतिनिधिमंडलें कन्नै मलाटी कीती ते उंदे आस्सेआ पुट्टे गेदे मुद्दे, मंगें गी सुनेआ ते उंदी शकैतें दा तौले नबेड़ा करने लेई आखेआ। किशतवाड़ दे जिला विकास परिषद दे चेयरमैन पूजा ठाकुर हुंदी अगुवाई च इक प्रतिनिधिमंडल नै विकास ते रोजगार दे मुद्दे पर मुख्यमंत्री हुंदा ध्यान केन्द्रित कीता। इक बक्खरी बैठक च जम्मू कश्मीर प्रदेश विधानसभा दे विधायकें कन्नै शामिल होइयै इक प्रतिनिधिमंडल नै मुख्यमंत्री हुंदे कन्नै पेश आवा'रदी चैताएं बारे चर्चा कीती। उनें पेंशन दे फायदे च बाद्धा करने ते एह्दे अलावा मैडिकल मते च बी बाद्धा करने दी गुजारश कीती।

<><><><><><>

Prakram Diwas

नेता जी सुभाष चंद्र बोस हुंदे सम्मान च अज्ज उंदी 128मीं ब'रे दे मौके उप्पर देसै च पराक्रम दिवस मनाया जा करदा ऐ। इस मौके उप्पर संस्कृति मंत्रालय आसेआ नेताजी हुंदे जरम आहली थाहर यानि कट्टक ओडीशा च त्र'ऊं दिनें तगर चलने आहले कार्यक्रमें दा सरिस्ता कीता जा करदा ऐ। ध्यानजोग ऐ जे अपने हाल दे मन की बात कार्यक्रम च प्रधानमंत्री नरेन्द्र मोदी होरें पराक्रम दिवस दा जिक्र करदे होई नेताजी सुभाष चंद्रा बोस हुंदे जोगदानें गी चेतता कीता हा। मोदी होरें सुभाष चंद्र बोस होरें'गी इक दूरदर्शी करार दिंदे होई देशै दे बसनीकें गी गुजारिश कीती ही जे ओह सुभाष चंद्र बोस हुंदे जीवन थमां प्रेरणा लैन।

<><><><><><>

Dy.CM

उपमुख्यमंत्री सुरिन्द्र चौधरी होरें कल जनता दरबार दा आयोजन कीती ते गली थमां काटेरी शिड़क परियोजना च सुधार आहन्ने ते ओह्दे कम्मकाज लेई नींह पत्थर रखेआ। वार्ड 2.6 किलोमीटर दी लंबाई आली इस मती जरूरी पहरयोजना गी रामबन दे लोकनिर्माण मैह्कमे पीडब्ल्यूडी ते आरएंडबी डिविजन आस्सेआ बनाया जा'रदा ऐ जेह्दी अंदाजन लागत 8 करोड़ 72 लख 84 ज्हार ऐ। इस परियोजना दा मकसद नाशरी थमां रामबन जिले दे मशहूर सैलानी थाहर सन्नासर तगर शिड़कें सरबंधी संपर्क गी मजबूत करना ऐ। इस बेहतर कनैक्टिविटी कन्नै सैलसफा ते मकामी आर्थिक गतिविधिएं च मता बाद्धा होने दी मेद ऐ जेह्दे कन्नै इस खेत्तर दे रौहने आले लोकें गी फायदा पुज्जग। इस कार्यक्रम च बोलदे होई उपमुख्यमंत्री होरें मुख्यमंत्री हुंदी अगुवाई च सब्बने लोकें गी उंदे दरवाजे तोड़ी सहूलत पजाने दी सरकार दी वचनबद्धता गी पही पक्का कीता।

<><><><><><>

Cabinet Sub Committee

आरक्षण नियमों बरै खडेरी गेदी काबीना दी उप-कमेटी नै कल सेहत ते मेडिकल शिक्षा सने समाज कल्याण ते शिक्षा मैहकमें दिएं मंत्री सकीना इत्तू हुंदी प्रधानता च इक बैठक लाई। जल शक्ति, जंगलात ते पर्यावरण ते जनजातीय मामलों दे मंत्री जावेद अहमद राणा हुंदे सने समाज कल्याण विभाग दे बड्डे अधिकारिणें ते सामान्य प्रशासनिक विभाग दे प्रतिनिधिणें बी इस बैठका च हिस्सा लैता। इस मौके उपपर उप-कमेटी नै मजूदा आरक्षण नीति गी लेइयै इच्छुक मेदवारें ते विद्यार्थिणें आसेआ पुट्टे गेदे बक्ख-बक्ख मामलों ते चैंताएं दी दिक्ख-सुन कीती। ध्यानजोग ऐ जे सरकार नै पिछले म्हीने आरक्षण सरबंधी नियमों दी नजरसानी लेई मंत्रिमंडल इस ऐकड़ी उप-कमेटी खडेरी ही। एह उप-कमेटी अपनी रिपोर्ट मुखमंत्री ओमर अब्दुल्ला हुंदी अगुवाई आहले मंत्रिमंडल गी सौंपग।

<><><><><><>

Social Welfare Minister

सेहत ते मेडिकल शिक्षा, समाज कल्याण ते शिक्षा मंत्री सकीना इत्तू होरें कल इक बैठक दी अध्यक्षता कीती जेहदे च समाज कल्याण मैहकमे दी बक्ख-बक्ख योजना जियां आईसीडीएस, मिशन शक्ति मिशन, वास्तव्या ते प्रधानमंत्री मातृ वंदना योजना ते होरने स्कीमें गी लागू करने ते उंदी प्रगति बारे जायजा लैता। बैठक दरान मंत्री होरें कपैक्स तैहत फंड दे इस्तेमाल दी स्थिति, आंगनवाड़ी दे वर्करें ते हैल्परें दी आंगनवाड़ी केन्द्रों दी ढांचागत स्थिति ते माली स्थिति ते आईसीडीएस योजनाएं सरबंधी होरने मुद्दें दी समीक्षा कीती। अफसरें गी संबोधत करदे होई सकीना इत्तू होरें बचचें, गर्भवती महिलाएं दे कन्नै कन्नै स्तनपान कराने आली महिलाएं गी नसल्ली खुराकते समृग सेहत गी बढ़ावा देने च पोशन अभियान दी मती महत्वै आली भूमिका पर जोर भरेआ।

<><><><><><>

R-Day Security

औंदे गणतंत्र दिवस गी दिखदे होई जम्मू-कश्मीर च सुरक्षा दे निगगर बंदोबस्त कीते गेदे न। 26 जनवरी दा मुख्य कार्यक्रम जम्मू च मोलाना आजाद स्टेडियम च उपराज्यपाल मनोज सिन्हा हुंदी प्रधानता च होग ते मुखमंत्री उमर अब्दुल्ला होर कार्यक्रम दे आदरजोग परौहने होडन। एहदे मद्देनजर समूलचे जम्मू-कश्मीर च सुरक्षा स्थिति गी होर तगड़ा करी दित्ता गेदा ऐ। पुलस ते अर्ध सैनिक बलें दे अंतरराष्ट्रीय बन्ने ते नियंत्रण रेखा उपपर बाढ़ू तैनाती कीती गई ऐ। एहदे अलावा प्रशासन नै सब्बन सरकारी ईमारतें गी शैल सनाहकड़े ढंगै कन्नै सजाने ते रोशन करने सने समूलचे केंद्र शासित प्रदेश च राष्ट्रीय गौरव ते एकता दे प्रतीक राष्ट्रीय झंडे गी चढ़ाने दे बी निर्देश दित्ते गए न।

सबबनें ईमारतें गी तिरंगे दे रंगें दिये रोशनी कन्ने सजाने उप्पर मुख्य ध्यान दित्ता जा रदा ऐ। एहदे अलावा सबबनें सरकारी मलाजमें गी निर्देश दित्ता गेदा ऐ जे ओह अपने-अपने जिले च होने आहले गणतंत्र दिवस दे अधिकारिक समारोह च हिस्सा लैन।

<><><><><><>